

**Uunga siunnersuut: Siusinaartumik pensionisiat pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx. 2018-imeersoq (Oqaatsitigut naqqiutit)**

**§ 1**

Siusinaartumik pensionisiat pillugit Inatsisartut inatsisaanni nr. 40, 9. december 2015-imeersumi Inatsisartut inatsisaanni nr. 19, 28. november 2016-imi aamma Inatsisartut inatsisaanni nr. 40, 23. november 2017-imeersumi allanngortinneqartumi ima allannguisoqassaaq:

**1. § 17, imm. 4, pkt. 2-mi** ima oqaasertalerneqassaaq:

“ § 17, imm. 2 naapertorlugu, tunngaviusumik pensionisiat appartinneqassapput, siusinaartumik pensionisiallip ukiumut tamarmiusunik piffissami pineqartumi isertitaasa, siusinaartumik pensionisiat, utoqqalinersiat pensionisiallu Inunnut Isumaginninnikkut isumannaallisaaneq pillugu Nunat Avannarliit isumaqatigiissutaat malillugu akiliutigineqarsimasut, ilanngunnagit, 28.000 kr.-t, qaffasinnerpaamik pensionisiat 50 %-ii ilanngullugit, sinnerpatigit ”

**2. § 29, ima oqaasertalerneqassaaq:**

“ **§ 29.** Inummut tapit kommunalbestyrelsimit akuersissutigineqartarput inuit ataasiakkaat pisariaqartitaat nalilersuiffigineqareernerisigut soorlu imaattut:

1) ingerlaavartumik pisartakkatut sivisunerpaamik ukiumut ataasiakkaarlugit aalajangersarneqartunik, imaluunniit

2) immikkut pisariaqartitat matussuserniarlugit ataasiarluni ikiorneqarneq, ilaatigut makkununnga:

a) isarussat,

b) atisat,

c) pequtit,

d) Kalaallit Nunaata iluani angalanermut aningaasartuutit naleqquttut, aamma

e) ataasiaannarluni aningaasartuutit allat pisariaqartutut naatsorsuutigineqartut.

*Imm. 2.* Kalaallit Nunaata avataanut angalanernut ataasiaannarluni ikiorsiissutinik tunniussisoqarsinnaanngilaq.

*Imm.3.* Inuttut tapit utertillugit akileqquneqarsinnaapput:

1) Illersorneqarsinnaanngitsumik aningaasanik aqutsinerlunneq pissutigalugu inuttut tapit tunniunneqarpata, imaluunniit

2) Siusinaartumik pensionisiaqartoq inuttut tapinik pisartagaqartoq kingusinnerusukkat aningaasanik piffissamut pineqartumut inuttut tapinik assinganik siunertaqartumik pissarsisimappat.

*Imm. 4.* Utertillugit akileeqqusineq aatsaat piumasarineqarsinnaavoq siusinaartumik pensionisiaqartumut tapinik aningaasaliissuteqarnermut atatillugu utertitsisussaataitanermik ilisimatitsisoqarsimappat.

*Imm. 5.* Siusinaartumik pensionisiaqartumut Kalaallit Nunaata avataani aalajangersimasumik najugaqartumut inuttut tapit tunniunneqassanngillat.

*Imm. 6.* Inuttut tapit pillugit Naalakkersuisut malittarisassanik ersarinnerusunik aalajangersaasinnaapput.”

## § 2

Inatsisartut inatsisaat atuutilerpoq 1. december 2018.

*Namminersorlutik Oqartussat, xx. xxx. 2018.*

Kim Kielsen